



Organisacion di  
Pensionado Publico di Aruba

# Organisacion di Pensionado Publico di Aruba

## Vision y mision

**OPPA** ta aspira un futuro caminda tur ex-empleado publico cu a baha cu pensioen, por disfruta di un bida digno, sigur y feliz den un comunidad cu ta reconoce nan y ta aprecia nan contribucion n'e desaroyo di e pais. OPPA ta desea pa nos tin un comunidad unda e pensionadonan, e adultonan mayo por tin un bos, cu gobierno y instancianan ta duna nan atencion y traha cu nan interes den mente, cu ta percura pa nan por gosa di suficiente recursonan financiero pa biba un bida trankil y di nivel apropia.

Mision di OPPA ta pa representa y defende e derecho y interes di su miembronan, promove nan bienestar y seguridad financiero y segura cu nan por tin un calidad di bida optimal. E mision aki di OPPA ta hancra den articulo 3 sub b di su statuto completamente revisa cu a bin na vigor na aña 2023. OPPA tin como obhetivo pa atende cu interes material y inmaterial di su miembronan.

Interesnan principal ta pensioen, poder di compra, cuido y salubridad, bienestar social, vivienda, impuesto p'e pensionado publico. Temanan inmaterial ta p.e. cuestionnan etico, eutanasia, cultura y identidad, balor y normanan, derecho di opinion y expresion di esaki. OPPA ta sali na vanguardia di su miembronan y tur otro pensionado.

OPPA ta tuma un posicion fuerte como interlocutor profesional y igual pa delibera y dicidi conhuntamente riba topiconan cu ta concerni e pensionadonan. OPPA su directiva ta consisti di miembronan cu diferente conocimiento profesional y hopi experiencia di trabou. OPPA ta contribui den forma constructivo pero tambe critico na desaroyo di maneho riba temanan relevante p'e pensionado.

*Den e siguiente seccion nos kier bisa algo di e interesnan material relevante.*

## Pensioen

OPPA ta di opinion cu un bon pensioen ta representa un pensioen fiho y rasonabel cu cual un pensionado por hiba un bida di nivel aceptabel, trankil sin mucho dolor di cabez y no mester depende di otro hende, financieramente. Miembronan di OPPA ta ricibi mensualmente un pensioen di Stichting Algemeen Pensioenfonds Aruba (APFA). Durante nan bida laboral nan a contribui cu e fondo di pensioen pa ora cu nan stop di traha cu 65 aña, nan ricibi un suma pa paga nan gastonan mensual di vivienda, cuminda, utilidad, transporte. Si resta algo por spaar esaki of gast'e na cosnan cu ta trece placer den e

bida diario. Banda di esaki e miembronan di OPPA ta ricibi pensioen di biehes (AOV) di Sociale Verzekeringsbank (SVb), cu tur persona cu a biba na Aruba desde su 15 aña ta ricibi.

*E suma di pensioen aki ta varia segun e añanan di estadia na Aruba cu ta un maximo di Afl. 1265,- pa un pensionado. Tambe e pensionado ta ricibi un reparatietoeslag cu e pensioen.*

## Poder di compra

OPPA ta mantene su mes na altura di costo di bida na Aruba y ta informa su miembronan riba esaki. OPPA ta analisa inflacion, gastonan di importacion di material, subida of bahada di tarifanan di utilidad, etc. E asuntonan aki ta afecta directamente e poder di compra di e pensionadonan.

## Cuido y salubridad

Aruba tin actualmente alrededor di 28 mil pensionado, di cual e grupo di 80+ aña ta aumentando. Esaki ta conoci como "dubbele vergrijzing". Mas bieu un persona bira mas e peticion pa cuido y salubridad ta aumenta. Ta conoci cu adultonan mayo cu mas frecuencia ta sufri di malesanan cronico, locual ta exigi mas di tratamento medico y medicamento. Bira bieu ta trece cu ne cu mester duna cuido n'esnan cu sea ta biba ainda den nan cas of ta biba den casnan di cuido. Casnan di cuido subsidia door di gobierno no tin suficiente luga pa tuma mas adulto mayo y casnan di cuido priva ta costa hopi placa.

## Bienestar social

Un pensionado feliz ta encera cu e ta gosa di un bon salud fisico y mental, ta rondona pa famia y amistadnan y ta participa na actividadnan. P'e pensionado ta hopi importante pa biba den un comunidad cu ta apreci'e, cu ta trat'e cu respet, cu ta comunica cu n'e y no ta exclui'e pasobra el a bira bieu.

## Vivienda

Mayoria di nos pensionadonan durante nan bida laboral a percura pa nan yega na nan propio cas. Yegando edad di pensioen nan yiunan a sali di cas y cas a bira grandi. Ta bin acerca cu mantencion di un cas ta costa placa y e prijsnan di material a subi substancialmente. Esaki ta trece cu ne cu hopi pensionado kier haya un vivienda mas chikito, di prijs rasonabel, den un bario sigur. Lamentablemente e casnan aki no ta disponibel of tin un huur hopi halto.

Den e articulonan cu lo sigui nos lo elabora mas riba e diferente topiconan.